

MAFUTAGA FAAFOUINA FAIFEAU MA AOA Tausinuu
AOKUSO 2012
MALUA

ILOILOGA O FETE'ENAIGA
(Conflict Analysis)

Faiva Alofi-Lima o le Mataupu Silisili
Practical Theology

UPU TOMUA

E muamua lava ona faatalofa atu i le paia o lenei mafutaga, i lau Susuga i le Taitai, Susuga i Toeaina, ae tainane le Aufaigaluega Paia a le Atua i Susuga i Faafeagaiga, o taitai o aulotu taitasi o le Ekalesia. Malo lava le soifua manuia. A o se taumafaiga lenei e faatalanoaina ai le mataupu e pei ona i ai, o le iloiloga, poo se suesuega, agai fete'enaiga eseese (*Conflict Analysis*).¹

FAATOMUAGA

E tele fete'enaiga o loo feagai pea ma le mamalu o lenei mafutaga, i nuu ma alalafaga o loo galulue ai. O ni fete'enaiga i manatu faaalua ma mafaufauga eseese; o ni fete'enaiga i nisi itu o le galuega; faatasi ai ma ni fete'enaiga i mataupu maaleale e pei o fanua i totonu o nuu. O le taumafaiga i lenei taeao, ina ia tau fesoasoani ai mo le paia o lenei mafutaga, ni auala e **malamalama manino** ai (*conflict analysis*) i fete'enaiga eseese, mo le faamoemoe maua i luga ina ia **foia ai nisi o fete'enaiga ma fe'eseeseaiga** tulai mai (*conflict resolution*).

O se faamatalaga autu² o fete'enaiga ou te fia faaogaina - ua tulai mai fete'enaiga poo fe'eseeseaiga, ona ua:

- (i) faaititia se feso'otaiga lelei i le vā o ni tagata poo ni faalapotopotoga (e lua, pe sili atu fo'i), i se mataupu tāua ua tulai mai (*communication breakdown*);
- (ii) tau faaititia le tamaoaga (*wealth/status*), ma punaoa faalenatura (*natural resources*), ma ua fetaua'iga ni tagata poo ni faalapotopotoga (e lua, pe sili atu fo'i) mo ia faamanuiaga;
- (iii) ua lē ō gatasi manaoga a tagata, auā e ese foi le mea o loo mana'o i ai le isi tagata.

¹ O lenei pepa ua tapenaina mai manatu ma aoga na maua mai se tasi o seminā na faapea ona auai atu i ai, i le Kolisi Faafaifeau o le Pasefika i Suva Fiji, i le masina o Aokuso 2011. O le auai atu i lea seminā, na faatupeina lava e le Kolisi Faafaifeau i Malua, Kolisi Faafaifeau o le Pasefika i Suva Fiji, faapea ma se fesoasoani tau tupe na maua mai le Ekalesia Aoao (EFKS). E fia faamauina ai la le agaga o le faafetai, e tusa ma lea avanoa na maua, i le tausaga na se'i mavae atu nei.

² Peacebuilding Intensive Lecture Notes 2011, Suva. Extract taken from *Peacebuilding: A Caritas Training Manual*.

FAAMALOLOGA E IESU O LE TAGATA SUPA MAREKO 2: 1-12

E tele ma anoanoai fete'enaiga o loo faamauina i le Tusi Paia.³ Ae ua ou manatu e aumai lenei tala e faailoa mai ai le tali a nei tama e to'afā, i le fete'enaiga na feagai ma i latou.


O se tala masani lenei tala, i le fa'amaloloina e Iesu o le tagata supa. O lea fa'atoā amata le galuega tala'i a Iesu i Kalilaia. Na ia fa'amalolo ai le toatele o tagata mama'i i le fale o Simona Peteru. Na ia fa'amalolo ai fo'i le tagata lepela, ina ua ia pa'i atu ia te ia. Ma o le mea ua tupu, ua alu le tala, ua salalau le tala, i mea ofoofogia ma uiga ese, e pei ona sa faia e Iesu. Ua o'o ifo Iesu i Kapanaumi, i le fale sa ia nofo ai, ma o se vaaiga mata'utia na ia vaai ai, e tusa ma le molimau a Mareko. Ua o'o lava i le faitotoa o lona fale, ua lē sao atu i ai seisi ona o le toatele o tagata; le toatele o le nu'u ua potopoto ifo e fia fa'alogologo ma fia molimau i ana vavega sa fai.

Peita'i, e le'i fa'apea na fa'avaivai ai tama nei e to'afā, i lo latou saili atu mo se fofō o lo latou uso ma'i. O le fete'enaiga na feagai ma i latou, ina ua lē ofi le fale sa nofo ai Iesu, ae ua latou taumafai lava e saili seisi auala. Atonu na latou vaavaai toto'a poo le a seisi faatinoga e mafai ona latou faia, ina ia tini ai le faamoemoe – o le o'o ifo o le ma'i supa ia Iesu. O lea na latou tatata ai loa le ufi o le fale, ma tu'utu'u malie ifo lo latou uso i lalo, ina ia maua se avanoa e o'o atu ia Iesu. Ma o le fetalaiga a Iesu, o lea na ia malolo ai.


O le mea e uiga ese ai le vavega lenei na fai e Iesu, ona o le fa'atuatua o tama nei e to'afā, lea na mālōlō ai le ma'i o lo latou uso. I lo latou taumafai pea e saili se auala e ave ai le latou ma'i ia Iesu, o lea na silafia ai e Iesu, le moni ma le fa'amaoni o lo latou fa'atuatua.

O ITUAIGA FETE'ENAIGA ESEESE: O LE LAU O LE FETE'ENAIGA (Conflict Tree)

E ui i le tele o fete'enaiga eseese e pei o le faamalologa e Iesu o le tagata supa, ae mafai ona faatulagaina i vaega o loo taua i lalo – OPEN, LATENT or SURFACE Conflict.



³ E pei o lenei - Galuega 6 & 15; 1 Korinito 1; Kalatia 2; Filipi 3 – o fete'enaiga o lo'o taua i tusi ia, ua faatatau lea i ni fete'enaiga i le Uluai Ekalesia. Kenese 1-3: Na faia e le Atua le tagata i lona faatusa, ma ua ia te ia le saolotoga e filifili ai, ma e tupu ai feteenaiga ona o ana filifiliga. Roma 14:1-7, o ni fete'enaiga agai meaa, faapea le faamamaluina o le Aso Sapati.




O se tasi o fa'amoemoe o le faatulagaina o le fete'enaiga/ faafitauli ua tulai mai e pei ona faailoa atu, ina iloa lelei se auala e ao ona tali atu ai i le fete'enaiga. Afai e taumafai e fofō le fa'afitauli i le tulaga na'o lona a'afiaga (*surface conflict*), ae ua lē vaai ane i mafua'aga loloto, e i ai le manatu e toe fa'atupulaia le fete'enaiga ona e lē o faamalieina le foia o le faafitauli i le loloto o lo'o mana'omia ai.

O le manatu, e ao pea ona saili le fete'enaiga/ faafitauli i lona tulaga ua matala ai (*open conflict*), ina ia o'o lava se fofō i le loloto o le fa'afitauli e tatau ona o'o i ai.⁴

⁴ I le tele o vasega o loo ou aoaoina i le Kolisi i Malua, faatasi ai ma le Aoga Tusi Paia a Malua, e tele lava ni fete'enaiga o loo faamauiina mai latou uma o loo aooga i ia vasega. E aafia ai mataupu nei: o le fananau o tamaitai talavou; o le faamalologa a le faifeau; o le filifiliga o faifeau i nuu; e tau leai se leo o tupulaga talavou i aiga, mea fai a le nuu, ma le ekalesia; ua tele ina lē malamalama tagata lotu i le tele o mea tau le lotu (confused church-goers); o ni aafiaga ona o le faamati.


IA SUIA O NI LAGONA LOTOMA'A'A (Stages of Transformation)



O LE VAAI MAMAO MAI, PO'O LE TŪ MAI I TOTONU (Standing from the mountain, or standing in the river)



O le vaai mamao lea i le vaitafe, ua iloa lelei atu le mea o lo'o agai ai. A o lona faalavelave, e lē o iloa tonu tulaga o loo i ai le vai. O lona mālūlū, o le malosi o le tafe, ma nisi tulaga. Faapenā foi le vaai mamao mai fete'enaiga, e iloa le amataga ma lona taunuuga, ae e lē o lagonaina le tele o mea tāua.



O le tū mai lea i totonu o le vaitafe, ua iloa lelei lava tulaga uma o loo i ai le vai. O lona mālūlū, o le malosi o le tafe, ma nisi tulaga. Faapenā foi le fete'enaiga ua tulai mai, seiloga lava ua lotolotoi i totonu o le faafitauli/fete'enaiga, ona faatoā lagonaina lea o lona tiga, ma mafaufauina loa ni auala e foia ai lagona ia.

UPU FAAIU

E leai se manatu o lenei pepa, e mafai ona fofōina le faatupulaia mai o le tele o faafitauli o loo feagai ma le paia o lenei mafutaga. A o le faamoemoe lava ia, atonu o ni auala nei e pei ona taua e mafai ona tatou nofo malamalama ai i fete'enaiga tutupu mai. Ma ina ua tatou malamalama lelei i itu uma o le tulai mai o fete'enaiga (*conflict analysis*), ona faatoā manino lea o ni auala e ono mafai ona foia ai (*conflict resolution*), ma fesoasoani e faaleleia mea ua faaletonu. O se mafua'aga foi lena e lē o tuuina atu i lenei pepa ni tali mo ni fa'atitaiga o fete'enaiga, auā e tofu lava le fete'enaiga ma ona foi aiaiga e ao ona vaavaai toto'a i ai. Atonu o le tatou fefaasoa'i i le ma'ea ai o lenei folasaga, o le ā manino atili ai nisi tulaga. Ma e pei ona taumafai uo e toafa o le tagata supa e o'o ia Iesu, i le naunautaiga ua leai lava seisi faamoemoe mo lo latou uso, e faapena foi se tuualalo a lenei pepa, ina ia tatou saili pea i le Agaga o le Atua e fesoasoani mai i le vaivai ma le faatauva o le tagata. Ua na o nisi nei o auala atonu e mafai ona fesoasoani atu, i le anoanoa'i o mea tutupu, i galuega uma o loo gafa taulimaina e le paia o lenei mafutaga.

Ia manuia tele le mafutaga i lenei tausaga

Alesana F Pala'amo
2012